

四庫全書

史部

欽定四庫全書

欽定外藩蒙古回部王公表傳卷之三十六

傳第二十

蘇尼特部總傳

蘇尼特部在張家口外至

京師九百六十里東西距四百六里南北距五百八
十里東界阿巴噶西界四子部落南界察哈爾正
藍旗牧廠北界瀚海元太祖十六世孫圖嚕博羅

特再傳至庫克齊圖墨爾根台吉號其部曰蘇尼
特兄庫登汗弟翁袞都喇爾台吉裔詳浩齊特烏
珠穆沁二部傳庫克齊圖墨爾根台吉子四長布
延琿台吉子綽爾袞居蘇尼特西路次貝瑪墨爾
根伊勒都齊次布延泰車臣貝哩卓哩克圖裔不
著次布爾海楚琥爾子塔巴海達爾漢和碩齊居
蘇尼特東路初皆服屬於察哈爾以林丹汗不道
徙牧瀚海北依喀爾喀天聰九年綽爾袞子素塞

偕喀爾喀車臣汗碩壘遣使貢方物崇德二年塔
巴海達爾漢和碩齊子騰機思騰機特莽古岱哈
爾呼喇偕台吉偉徵等各遣使來朝

賜朝鮮貢物三年台吉務善伊勒登多爾濟喀喇巴圖魯
色稜達爾瑪等從征喀爾喀扎薩克圖汗偵遁乃
還四年春台吉超察海噶布楚璫古特卓特巴什
達喇莽古思鄂爾齋巴圖賴額思赫爾僧格等來

朝

賚冠服甲冑弓矢冬騰機思素塞各率屬自喀爾喀來歸

入

覲獻駝馬五年正月

賜素塞騰機思騰機特莽古岱哈爾呼喇及台吉佈達什

希布阿玉什噶爾瑪色稜額爾克辰寶茂海伊勒

畢什等甲冑銀幣十月台吉烏班岱棟果爾鄂爾

齊博希沙津等來貢馬

賚冠服鞍轡六年授騰機思扎薩克多羅郡王七年授素

塞扎薩克多羅杜稜郡王以騰機思掌左翼素塞
掌右翼順治三年騰機思以車臣汗碩壘誘叛率
弟騰機特及台吉烏班岱多爾濟斯喀等逃喀爾
喀

上遣師偕外藩軍由克嚕倫追剿至諤特克山及圖拉河
騰機思騰機特遁獲其孥烏班岱多爾濟斯喀為
四子部落軍陣斬師旋以烏班岱從子託濟弗從
叛且隨勦

賜所俘五年騰機思及騰機特悔罪乞降

詔宥死仍襲爵如初康熙十年所部歎收

詔發宣化府及歸化城儲粟賑之復酌給馬牛羊二十年
遣官察給兩翼災戶銀米二十七年噶爾丹侵喀爾喀

詔選兵二千防汛二十九年噶爾丹襲喀爾喀昆都倫博

碩克圖衮布

詔所部王以下願効力者赴軍聽用尋噶爾丹入烏珠穆

沁界

諭還駐本旗要汛三十五年

上親征噶爾丹

詔選兵赴烏爾輝聽調以牧馬郭和蘇台

諭偕浩齊特阿巴噶阿巴哈納爾部長董牧務凱旋

諭獎飼牧得宜並

優賚監牧及修道鑿井諸弁兵以右翼扎薩克屬旺舒克
左翼扎薩克屬博羅扎布嚮導功

賜號達爾漢復

詔郡王薩穆扎之第三子多爾濟思哈布貝勒博木布之
長子素岱會師圖拉緝噶爾丹尋分右翼兵赴珠
勒輝克爾阿濟爾罕左翼兵赴伊察扎罕以不見
賊踪撤還五十四年

詔發張家口儲粟並帑十萬自台吉下六萬四千九百餘
丁徧贍之雍正元年右翼二等台吉進達克以追
捕叛賊遇害晉贈一等台吉

命視公爵致祭子三長噶爾瑪遜多布封輔國公次噶爾瑪

策布騰次恭格垂穆丕勒以隨捕賊功各晉台台
秩有差噶爾瑪遜多布爵後停襲二年所部災

賜銀賑之九年調兵屯克嚕倫界防禦噶爾丹策凌十年
有奏商都達布遜諾爾牧廠應移蘇尼特汛者

上飭止之令各居其牧十二年所部兵駐防達哩剛愛十
三年撤還乾隆十二年以災告饑

遣官往賑所部二旗左翼駐和林圖察伯台岡右翼駐薩
敏西勒山隸錫林郭勒盟爵四扎薩克多羅郡王

一附多羅貝勒一扎薩克多羅杜稜郡王一附輔
國公一由貝勒降襲

原封扎薩克多羅郡王騰機思列傳

騰機思蘇尼特部人姓博爾濟吉特元太祖二十
世孫初號墨爾根台吉崇德二年表貢駝馬

賜其使阿巴圖布幣三年五月復遣阿巴圖來朝十二月
遣塔布囊巴克察爾鄂齊爾等貢駝馬

賚銀幣四年率子弟及部衆來歸

賜宴五年正月以阿巴圖往來勤力

賜號達爾漢九月騰機思尚郡主授和碩額駙六年正月
來朝十月封扎薩克多羅郡王留墨爾根號

詔世襲罔替弟騰機特封多羅貝勒莽古岱哈爾呼喇授
二等台吉騰機思長子額琳辰騰機特長子博木
布授三等台吉諸子各授四等台吉順治元年率
台吉阿喇海來朝

賜宴及雕鞍弓矢皮幣先是騰機思依喀爾喀車臣汗碩

壘後來歸受封碩壘忌之誘仍附已三年騰機思偕騰機特及台吉烏班岱叛將奔附碩壘牧豫親王多鐸奉

命徵外藩兵會勦至盈阿爾察克山偵賊屯袞噶嚕即分兵扼險騰機思遁擊之誘特克山迎郡主還大軍由圖拉追剿至布爾哈圖斬台吉茂海及騰機特子多爾濟巴圖舍津騰機思孫噶爾瑪特穆德博音圖等碩壘遣子本巴約土謝圖汗袞布兵來援

我軍迎擊於扎濟布拉克大敗之騰機思走色楞額河四年車臣汗碩壘土謝圖汗衮布各遣使謝罪

諭擒獻騰機思五年騰機思以我使達德鄂爾濟圖等宣諭招撫仍偕騰機特悔罪降比至騰機思病死

詔宥前罪騰機特襲封扎薩克多羅郡王除墨爾根號

一次襲騰機特騰機思弟崇德六年封多羅貝勒
順治三年從騰機思叛奔喀爾喀五年來降仍

賜宴賚尋

命襲扎薩克多羅郡王康熙二年卒騰機思子薩穆扎襲

二次襲薩穆扎騰機思第四子初由三等台吉封

多羅貝勒互見彼傳康熙三年襲扎薩克多羅郡

王二十七年

詔選左右翼兵二千偵禦噶爾丹三十五年

上親征噶爾丹薩穆扎率二等台吉扎布垂扎卜素岱納

穆扎布畢哩克等迎

覲行幄請從征

諭曰自噶爾丹侵喀爾喀爾旗供應信使驛馬食物顯著
勞績台吉扎布等令隨大軍行王年邁可勿往三十七

年卒子垂濟恭蘇隴襲

三次襲垂濟恭蘇隴薩穆扎第五子康熙三十七
年襲扎薩克多羅郡王三十八年以隸鑲黃旗察
哈爾之巴爾呼衆叛逃率兵追斬之

賚衣幣五十五年大軍勦策妄阿喇布坦垂濟恭蘇隴督

錫林郭勒兵赴額爾德尼昭駐防五十九年越額爾齊斯河由布拉罕布魯爾至博克薩里界擊準噶爾賊

賚銀幣六十一年駐察罕度爾雍正二年撤還九年

詔內扎薩克四十九旗簡兵五千聽西北兩路軍檄調以垂濟恭蘇隴督之尋卒於軍子旺辰襲

四次襲旺辰垂濟恭蘇隴第三子雍正十年襲扎薩克多羅郡王乾隆八年

命乾清門行走十六年授副盟長二十年大軍勦達瓦
齊旺辰獻馬助得紀錄二十四年復獻駝

賚幣二十八年卒子車稜袞布襲

五次襲車稜袞布旺辰長子初授一等台吉乾隆
二十八年襲扎薩克多羅郡王

命乾清門行走

賜三眼孔雀翎三十一年授副盟長三十二年卒子阿

爾達什第襲

六次襲阿爾達什第車稜袞布長子乾隆三十二年襲扎薩克多羅郡王四十六年卒無嗣

命其叔父額勒克津襲

七次襲額勒克津阿爾達什第叔父乾隆四十七年襲扎薩克多羅郡王

附多羅貝勒薩穆扎列傳

薩穆扎原封郡王騰機思子崇德六年授三等台吉順治三年從父叛奔喀爾喀五年來降六年尚

郡主授和碩額駙尋封多羅貝勒

詔世襲罔替康熙三年其叔父扎薩克郡王騰機特卒薩
穆扎晉襲爵互見扎薩克傳

一次襲博木布郡王騰機特長子康熙三年襲多
羅貝勒二十七年

詔隨薩穆扎偵禦噶爾丹三十九年卒子素岱襲

二次襲素岱博木布長子初授二等台吉康熙三
十五年

上親征噶爾丹素岱迎

覲行幄請從征

命赴圖拉河偵賊尋

諭留駐汎界三十九年襲多羅貝勒四十六年卒子台吉

· 茂戴先卒孫西哩襲

三次襲西哩素岱孫康熙四十六年襲多羅貝勒

乾隆六年卒子齊旺多爾濟襲

四次襲齊旺多爾濟西哩長子乾隆六年襲多羅

貝勒九年卒子甘珠爾襲

五次襲甘珠爾齊旺多爾濟長子乾隆九年襲多
羅貝勒三十三年卒子恭桑扎勒襲

六次襲恭桑扎勒甘珠爾長子乾隆三十三年襲
多羅貝勒

扎薩克多羅杜稜郡王素塞列傳

素塞蘇尼特部人姓博爾濟吉特郡王騰機特族
兄初號巴圖爾濟農天聰九年表貢駝馬崇德三

年復遣使巴綏貢四年來歸

賜宴六年以部校瑪達海都穆固爾鄂爾齋等擒明哨卒

於張家口匿不報議瑪達海等罪如律

詔宥之七年率台吉博希沙津等來朝

賜朝服雕鞍及幣封扎薩克多羅杜稜郡王

詔世襲罔替八年獻駝馬順治三年卒子二長噶爾瑪封

多羅貝勒自有傳次沙希岱襲郡王

一次襲沙希岱素塞次子順治四年襲扎薩克多

羅杜稜郡王來朝

賜宴及甲冑鞍轡會

駕由張家口獵塞外

駐蹕海流圖河口沙希岱獻馬

賚冠服甲冑弓矢十六年以貧乏

賜馬百牛五十羊千康熙九年卒子二長恭格次阿玉什

相繼襲

二次襲恭格沙希岱長子康熙九年襲扎薩克多

羅杜稜郡王十二年卒子勞彰襲

三次襲勞彰恭格長子康熙十二年襲扎薩克多
羅杜稜郡王十四年卒無嗣

命其叔父阿玉什襲

四次襲阿玉什沙希岱次子康熙十四年襲扎薩
克多羅杜稜郡王二十年蘇尼特兩翼告饑

遣官察給銀米以右翼被災重

命移牧察哈爾且給牲畜是冬阿玉什來朝

上諭曰爾為部長所屬人等自當矜恤撫養豈可獨圖暇逸且爾與喀爾喀互相侵盜理宜各加嚴禁擇視善地飼牧牲畜令得遂生朕所以再三教誨者無非欲各部人民安生樂業耳爾其識之二十二年請歸移牧衆仍命察給銀米三十二年卒子達哩扎布襲

五次襲達哩扎布阿玉什長子康熙三十二年襲扎薩克多羅杜稜郡王雍正七年卒子四長旺青齊蘇隴襲郡王次朋素克額琳沁授台吉次車稜

多爾濟亦襲郡王次諾爾布授台吉

六次襲旺青齊蘇嚨達哩扎布長子雍正七年襲

扎薩克多羅杜稜郡王十二年駐防達哩剛愛十

三年撤還乾隆六年卒子二長丹津車稜次朗衮

車稜相繼襲

七次襲丹津車稜旺青齊蘇嚨長子乾隆六年襲

扎薩克多羅杜稜郡王九年卒弟朗衮車稜襲

八次襲朗衮車稜旺青齊蘇嚨次子乾隆九年襲

扎薩克多羅杜稜郡王十六年卒無嗣

命其叔父車稜多爾濟襲

九次襲車稜多爾濟達哩扎布第三子乾隆十六年襲扎薩克多羅杜稜郡王三十四年以誣許妻削爵子車稜衮布襲

十次襲車稜衮布車稜多爾濟長子乾隆三十四年襲扎薩克多羅杜稜郡王

附多羅貝勒噶爾瑪列傳

今襲輔國公

噶爾瑪杜稜郡王素塞長子崇德五年貢駝馬貂

皮

賜冠服甲冑及帶順治三年騰機思叛奔喀爾喀噶爾瑪

馳疏

聞

諭獎之六年以不附叛功封多羅貝勒康熙二年卒子丹

津襲

一次襲丹津噶爾瑪長子康熙二年襲多羅貝勒

十一年卒子沙哩襲

二次襲沙哩丹津長子康熙十一年襲多羅貝勒

四十三年卒子阿弼達降襲輔國公

三次襲阿弼達沙哩長子康熙四十三年襲輔國

公四十八年卒子洛壘襲

四次襲洛壘阿弼達長子康熙四十八年襲輔國

公乾隆三十年卒子扎什喇布坦襲

五次襲扎什喇布坦洛壘長子乾隆三十年襲輔

國公四十年以病罷子羅卜藏車稜襲

六次襲羅卜藏車稜扎什喇布坦次子乾隆四十

年襲輔國公四十九年

詔世襲罔替

欽定外藩蒙古回部王公表傳卷之三十六

欽定四庫全書

欽定外藩蒙古回部王公表傳卷之三十七

傳第二十一

阿巴噶部總傳

阿巴噶部在張家口外至

京師千里東西距二百里南北距二百一十里東界

阿巴哈納爾西界蘇尼特南界正藍旗察哈爾牧

廠北界瀚海元太祖第五人布格博勒格圖其季

也勇力絕人從平諸部有功太祖嘗曰布格博勒
格圖之勇哈布圖哈薩爾之射此朕所以取天下
也詳見元史布格博勒格圖十七傳至巴雅思瑚
布爾古特子二長塔爾尼庫同號所部曰阿巴噶
次諾密特默克圖詳阿巴哈納爾部總傳塔爾尼
庫同子二長素僧克偉徵子額爾德尼圖捫號扎
薩克圖諾顏次揚古岱卓哩克圖子多爾濟號額
齊格諾顏初稱阿嚕蒙古服屬於察哈爾以林丹

汗不道徙牧瀚海北克嚕倫河界依喀爾喀車臣
汗碩壘天聰二年偕喀喇沁土默特鄂爾多斯諸
部長擊察哈爾衆四萬于土默特之趙城復約喀
爾喀偕喀喇沁乞師問察哈爾罪六年台吉竒塔
特楚琥爾攜衆五百內附九年大軍收服察喀爾
額爾德尼圖捫孫都思噶爾等附車臣汗碩壘
表貢方物崇德四年額齊格諾顏多爾濟自喀爾
喀來歸時有同名多爾濟者號達爾漢諾顏率衆

僭至六年

詔授額齊格諾顏多爾濟為扎薩克多羅卓哩克圖郡王
順治八年都思噶爾自喀爾喀來歸

詔授扎薩克多羅郡王以多爾濟掌左翼都思噶爾掌右
翼

遣官定牧地康熙六年阿巴哈納爾部乞降以阿巴噶牧
地

賜之

遣官視浩齊特蘇尼特界外水草豐美地指給阿巴噶移
牧二十九年噶爾丹侵喀爾喀

詔所部王以下願効力者赴軍聽用復

諭偕阿巴哈納爾供軍糈兼防新降喀爾喀掠諸內扎薩
克牧產三十一年以台吉班第額爾德尼岱青根
敦巴雅爾納木塔爾扎木素齊旺達什等導烏梁
海衆內附均授二等台吉三十五年

上親征噶爾丹牧馬郭和蘇台

諭偕浩齊特蘇尼特阿巴哈納爾諸部長董牧務凱旋
諭獎飼牧得宜並

優賚監牧及修道鑿井諸弁兵復以所部達濟桑阿嚮導

功

賜號達爾漢三十六年王貝子台吉等朝正請備馬從軍
慰令各歸所部時有二等台吉圖巴扎布色臣楚琥爾者

年八十八

諭嘉其奮志報効

優賚之五十四年以災歉收

詔發唐三營儲粟賑之復

賜無產台吉牲牧雍正二年

遣官齎銀賑所部貧戶九年大軍勦噶爾丹策凌檄兵駐

達哩剛愛十三年撤還所部二旗左翼駐科布爾

塞哩右翼駐巴顏額倫隸錫林郭勒盟爵四扎薩

克多羅卓哩克圖郡王一扎薩克多羅郡王一附

固山達爾漢貝子一輔國達爾漢公一由貝子降

襲

扎薩克多羅卓哩克圖郡王多爾濟列傳

多爾濟阿巴噶部人姓博爾濟吉特元太祖弟布格博勒格圖二十世孫號額齊格諾顏崇德三年遣台吉綽爾濟貢馬及貂皮四年偕同部達爾漢諾顏多爾濟至烏珠穆沁界乞歸誠

詔諸王大臣迎宴演武場入

覲獻駝馬

宴賚之五年春來朝

賚甲胄弓矢秋遣屬噶爾瑪色臣楚琥爾等貢馬六年封

扎薩克多羅卓哩克圖郡王

詔世襲罔替是年冬遣固穆及巴特瑪邁濟吉等獻駝馬
牛羊順治二年卒子塞爾珍襲

一次襲塞爾珍多爾濟長子順治二年襲扎薩克
多羅卓哩克圖郡王三年以其屬赫爾哲伊從勦
蘇尼特叛人騰機思至喀爾喀嚮導功

賜號達爾漢康熙八年卒子德木伯勒襲

二次襲德木伯勒塞爾珍長子康熙八年襲扎薩

克多羅卓哩克圖郡王十六年卒子二長楚英次

弼英相繼襲

三次襲楚英德木伯勒長子康熙十七年襲扎薩

克多羅卓哩克圖郡王三十年卒子二長色稜次

達瑪璘扎布相繼襲

四次襲色稜楚英長子康熙三十年襲扎薩克多

羅卓哩克圖郡王三十四年卒弟達瑪璘扎布襲
五次襲達瑪璘扎布楚英次子康熙三十四年襲
扎薩克多羅卓哩克圖郡王三十九年以不稱職
削爵

命其叔父弼英襲

六次襲弼英德木伯勒次子初授二等台吉康熙
三十九年襲扎薩克多羅卓哩克圖郡王五十四
年卒子扎木巴勒扎布襲

七次襲扎木巴勒扎布弼英第三子康熙五十四年襲扎薩克多羅卓哩克圖郡王雍正十一年奉命駐達哩剛愛防禦噶爾丹策凌

賚冠服貂皮乾隆十三年授副盟長十六年卒子車稜旺布襲

八次襲車稜旺布扎木巴勒扎布次子乾隆十六年襲扎薩克多羅卓哩克圖郡王二十年大軍勦達瓦齊車稜旺布獻馬助二十四年解錫林郭勒

所購駝馬納橫城軍營得紀錄四十一年卒子喇
特納什第襲

九次襲喇特納什第車稜旺布長子乾隆四十一
年襲扎薩克多羅卓哩克圖郡王

扎薩克多羅郡王都思噶爾列傳

都思噶爾阿巴噶部人姓博爾濟吉特卓哩克圖
郡王多爾濟從孫額爾德尼圖捫子四長布達
什哩號車臣扎薩克圖子即都思噶爾次達裕次

桑噶爾寨皆嗣絕次多爾濟號達爾漢諾顏別有
傳都思噶爾初號巴圖爾濟農以避察哈爾依喀
爾喀天聰三年因察哈爾來歸之台吉昂坤杜稜
獻馬乞好九年表貢駝馬貂皮崇德二年遣屬阿
玉什朝順治八年來歸封扎薩克多羅郡王
詔世襲罔替十年卒子沙克沙僧格襲

一次襲沙克沙僧格都思噶爾長子順治十一年
襲扎薩克多羅郡王十六年以牧產不給

賚馬牛羊康熙二十四年

詔發宣府儲粟賑所屬貧戶是年沙克沙僧格卒子二長

烏爾彰噶喇布襲郡王次德木楚克封固山達爾

漢貝子自有傳

二次襲烏爾彰噶喇布沙克沙僧格長子康熙二

十六年襲扎薩克多羅郡王五十三年卒子巴特

瑪袞楚克襲

三次襲巴特瑪袞楚克烏爾彰噶喇布長子康熙

五十三年襲扎薩克多羅郡王六十一年卒子索諾木喇布坦襲

四次襲索諾木喇布坦巴特瑪袞楚克長子雍正元年襲扎薩克多羅郡王九年大軍勦噶爾丹策凌索諾木喇布坦遣台吉旺布等解錫林郭勒所購駝納察罕度爾軍營十年授副盟長十二年晉盟長乾隆十九年議勦達瓦齊奉

命督內扎薩克蒙古所購駝馬解赴翁吉軍營復自獻

馬助得紀錄二十年

賜親王品級二十二年率台吉諾爾津扎布阿喇布坦
等勦掠達哩剛愛多倫諾爾及喀爾喀諸部賊

諭獎之叙功加二級是年

命御前行走二十三年遣員購錫林郭勒健駝四千納
巴里坤軍營復自獻馬助三十年卒子鼐布坦常
忠襲郡王親王品級停襲

五次襲得布坦常忠索諾木喇布坦長子乾隆三

十一年襲扎薩克多羅郡王四十八年卒子衮布
扎布襲

六次襲衮布扎布爵布坦常忠長子乾隆四十九
年襲扎薩克多羅郡王

附固山達爾漢貝子多爾濟列傳

多爾濟郡王都思噶爾叔父號達爾漢諾顏崇德
四年偕額齊格諾顏多爾濟來歸五年遣使圖卓
爾弼等貢馬七年來朝

賜朝服雕鞍并朝鮮貢物順治三年封固山達爾漢貝子
詔世襲罔替十一年卒子綽博和襲

一次襲綽博和多爾濟長子順治十一年襲固山
達爾漢貝子康熙二年來朝十五年卒子車稜棟
囉布襲

二次襲車稜棟囉布綽博和長子康熙十五年襲
固山達爾漢貝子雍正四年卒子台吉額琳沁先
卒孫齊旺襲

三次襲齊旺車稜棟囉布孫雍正五年襲固山達
爾漢貝子十年解錫林郭勒所購駝馬納科布多
軍營乾隆十九年獻馬助軍得紀錄二十一年卒
子台吉巴勒先卒孫朋素克襲

四次襲朋素克齊旺孫乾隆二十一年襲固山達
爾漢貝子

附 固山達爾漢貝子德木楚克列傳

今襲輔國
達爾漢公

德木楚克郡王沙克沙僧格次子初授二等台吉

康熙二十九年從大軍擊噶爾丹至烏蘭布通獲
其牧羣三十五年

上親征噶爾丹德木楚克躬領嚮導衆視牧地凱旋迎
覲賀捷三十六年奉

命赴察罕陀羅海宣

諭青海部長由鎮海堡入

覲叙功晉一等台吉五十四年封輔國達爾漢公六十一

年

諭嘉其効力久且誠謹晉鎮國公雍正二年晉固山貝子

仍達爾漢號三年卒子鄂爾齋圖降襲輔國達爾

漢公

一次襲鄂爾齋圖德木楚克次子雍正四年襲輔

國達爾漢公乾隆十五年卒子旺沁扎布襲

二次襲旺沁扎布鄂爾齋圖長子乾隆十六年襲

輔國達爾漢公三十二年卒子齊巴克扎布襲

三次襲齊巴克扎布旺沁扎布長子乾隆三十二

年襲輔國達爾漢公四十九年

詔世襲罔替

欽定外藩蒙古回部王公表傳卷之三十七

欽定四庫全書

欽定外藩蒙古回部王公表傳卷之三十八

傳第二十二

阿巴哈納爾部總傳

阿巴哈納爾部在張家口外至

京師千五十里東西距百八十里南北距四百三十

六里東界浩齊特西界阿巴噶南界察哈爾正藍

旗牧廠北界瀚海元太祖弟布格博勒格圖十八

傳至諾密特默克圖號所部曰阿巴哈納爾兄塔爾尼庫同詳阿巴噶部總傳諾密特默克圖再傳至多爾濟伊勒登子二長色稜墨爾根次棟伊思喇布初稱阿噶蒙古依喀爾喀車臣汗碩壘駐牧克嚕倫河界其地在瀚海北崇德七年有和碩泰者台吉達喇務巴三察屬也携孥內附嗣托克託伊達嚕噶達賴等至皆優養之康熙元年台吉阿喇納噶爾瑪宰桑固英等越瀚海南牧綽諾陀羅

海近內汛三年色稜墨爾根復如之守臣以

聞

上知為喀爾喀所脅宥罪遣歸因

諭喀爾喀以噶爾拜瀚海為牧界繼此有越者留勿遣四
年喀爾喀復違

諭令阿巴哈納爾諸台吉牧瀚海南棟伊思喇布弗之從
尋偕台吉阿喇納噶爾瑪等率衆來歸

詔授扎薩克固山貝子阿喇納噶爾瑪以各攜丁七百餘

均授一等台吉五年色稜墨爾根亦來歸六年

詔授扎薩克多羅貝勒

遣官指示阿巴噶部移牧他所以舊牧地給阿巴哈納爾

色稜墨爾根掌左翼棟伊思喇布掌右翼二十七
年噶爾丹侵喀爾喀哲卜尊丹巴呼圖克圖奔赴
內汛所部班第岱青車稜岱青奉

詔督兵二百往護復選兵千三百由瀚海偵噶爾丹先是
色稜墨爾根棟伊思喇布來歸阿巴哈納爾諸台

吉有留居喀爾喀者至是隨哲卜尊丹巴呼圖克
圖額爾德尼台吉納木扎勒等至曰根敦額爾克
曰阿海烏巴什曰伊克岱青曰額爾克烏巴什挈
屬戶千餘

詔納之二十九年噶爾丹復侵喀爾喀至烏勒扎河所部
選兵四千從大軍迎擊復

諭偕阿巴噶供軍糈兼防新降喀爾喀掠諸內扎薩克牧
產三十五年

上親征噶爾丹牧馬郭和蘇台

諭偕浩齊特蘇尼特阿巴噶諸部長董牧務凱旋

諭獎飼牧得宜並

優賚修道鑿井諸弁兵復以所部索諾木伊嚕爾圖嚮導

功

賜號達爾漢五十四年以災歉收

詔發唐三營儲粟賑之復

賜無產台吉牲牧雍正二年

遣官齎銀賑所部貧戶九年大軍勦噶爾丹策凌檄兵駐

達哩剛愛十三年撤還所部二旗右翼駐昌圖山

左翼駐烏勒扈陀羅海隸錫林郭勒盟爵二扎薩

克多羅貝勒一扎薩克固山貝子一

扎薩克多羅貝勒色稜墨爾根列傳

色稜墨爾根阿巴哈納爾部人姓博爾濟吉特元

太祖弟布格博勒格圖二十一世孫康熙五年攜

衆千三百餘至阿巴噶右翼牧地乞歸誠

詔允之六年議政王大臣等請授鎮國公爵

詔封扎薩克多羅貝勒世襲罔替其長子納木喀爾次子

旺什轄布三子扎勒布四子阿弼達均授二等台

吉納木喀爾長子卓特巴旺什轄布長子噶爾瑪

均授四等台等十九年卒子納木喀爾襲

一次襲納木喀爾色稜墨爾根長子康熙十九年

襲扎薩克多羅貝勒二十三年卒長子卓特巴先

卒次子布昭襲

二次襲布昭納木喀爾次子康熙二十四年襲扎
薩克多羅貝勒三十五年

上親征噶爾丹凱旋布昭迎

覲賀捷

宴賚之四十八年卒子齊當旺舒克襲

三次襲齊當旺舒克布昭長子康熙四十八年襲
扎薩克多羅貝勒四十九年卒子索諾木喇布坦
襲

四次襲索諾木喇布坦齊當旺舒克長子康熙四十九年襲扎薩克多羅貝勒五十九年卒無嗣從弟納木扎襲

五次襲納木扎納木喀爾孫台吉卓特巴子康熙五十九年襲扎薩克多羅貝勒雍正十年解錫林郭勒所購駝馬萬餘納烏里雅蘇台軍營

獎賜表幣十三年卒子達什敏珠爾襲

六次襲達什敏珠爾納木扎長子雍正十三年襲

扎薩克多羅貝勒乾隆三十五年卒子車登扎布

襲

七次襲車登扎布達什敏珠爾長子乾隆三十五年襲扎薩克多羅貝勒四十四年卒子瑪哈巴拉

襲

八次襲瑪哈巴拉車登扎布長子乾隆四十四年襲扎薩克多羅貝勒

扎薩克固山貝子棟伊思喇布列傳

棟伊思喇布阿巴哈納爾部人姓博爾濟吉特貝勒色稜墨爾根弟康熙四年攜衆二千餘至喀爾喀右翼牧地乞歸誠

詔允之議政王大臣等請授輔國公爵

詔封扎薩克固山貝子世襲罔替其長子衮楚克扎布次子博羅勒岱均授三等台吉二十年卒子衮楚克扎布襲

一次襲衮楚克扎布棟伊思喇布長子康熙二十

一年襲扎薩克固山貝子二十四年卒子額璘臣

達什襲

二次襲額璘臣達什袞楚克扎布長子康熙二十
四年襲扎薩克固山貝子三十五年

上親征噶爾丹凱旋額璘臣達什迎

覲賀捷

宴賚之五十五年卒子班珠爾襲

三次襲班珠爾額璘臣達什長子康熙五十六年

襲扎薩克固山貝子雍正十一年以大軍勦噶爾丹策凌獻馬助得紀錄乾隆十四年扈


駕木蘭行圍

命乾清門行走十九年議勦達瓦齊班珠爾獻馬千駝六十助軍

賜貝勒品級二十九年卒子達克丹朋素克襲貝子貝勒品級停襲

四次襲達克丹朋素克班珠爾第三子乾隆二十

九年襲扎薩克固山貝子



欽定外藩蒙古回部王公表傳卷之三十八

欽定四庫全書

史部

欽定外藩蒙古回部王公表傳卷三十九至四十四

主事_臣陳若霖覆校

總校官編修_臣倉聖脈

欽定四庫全書

欽定外藩蒙古回部王公表傳卷之三十九

傳第二十三

四子部落總傳

四子部落在張家口外至

京師九百六十里東西距二百三十五里南北距二百四十里東及北界蘇尼特西界歸化城土默特南界察哈爾鑲紅旗牧廠元太祖弟哈布圖哈薩

爾十五世孫諾延泰與其兄昆都倫岱青游牧呼倫貝爾均稱阿魯蒙古昆都倫岱青裔詳阿魯科爾沁部總傳諾延泰子四長僧格號墨爾根和碩齊次索諾木號達爾漢台吉次鄂木布號布庫台吉次伊爾扎木號墨爾根台吉四子分牧而處後遂為其部稱天聰四年阿魯諸部長內附伊爾扎木來獻駝馬貂皮

賜晏

命坐大貝勒代善右以優異之五年僧格從征明大凌河
敗錦州援兵獻俘百餘

賜酒勞飲給陣獲甲仗六年僧格從征察哈爾七年索諾
木鄂木布伊爾扎木相繼獻駝馬

賚甲冑雕鞍鞵帶及幣八年鄂木布伊爾扎木復獻駝馬
命諸貝勒以次宴之尋

遣大臣赴碩翁科爾定諸藩牧以都木達都騰格里克鄂
多爾台為其部牧界九年夏伊爾扎木隨大軍收

察哈爾汗子額哲盡降其衆冬獻駝馬貂皮崇德元年

宣諭朝鮮其部伊爾遜德齋書從遇明皮島兵阻擊斬二人還得

優賚是年授鄂木布扎薩克俾統四子部落三年伊爾扎木從征明山東四年從征松山師旋以前遣兵不及額又弗朝正議奪所屬人戶

詔從寬罰牲畜五年來朝

賚甲冑弓矢綵幣六年

上親征明圍松山其部將多爾拜隨大軍設伏高橋及桑
阿爾齋堡追杏山逃卒獲之順治元年從入山海
關擊流賊李自成六年四月追叙所屬昂安導鄂
木布等來歸功予世職康熙十年所部歎收

詔以宣府及歸化城儲粟賑之十三年調兵協勦陝西叛
賊王輔臣

諭嘉其聞命即赴十四年由寧夏進勦尋分防太原大同

十五年調赴河南聽江西大軍檄勦逆藩吳三桂
十七年以厄魯特額爾德尼和碩齊等掠烏喇特
牧

諭嚴防汎二十一年

詔發大同宣府儲粟賑所屬貧戶復以察哈爾牧產贍之
二十七年噶爾丹侵喀爾喀仍

諭防汎二十九年選兵赴圖拉河偵噶爾丹會噶爾丹由
喀爾喀河追襲昆都倫博碩克圖衮布

詔移兵駐歸化城尋撤還三十四年

諭備兵聽西路軍調三十五年隨大將軍費揚古敗噶爾丹於昭莫多復簡兵百防喀爾喀親王善巴汎三十六年朔漠平

賜從征及坐塘監牧諸弁兵銀雍正九年從勦噶爾丹策凌乾隆十八年議勦達瓦齊

詔購駝馬送軍所部一旗駐烏蘭額爾濟坡與茂明安烏喇特喀爾喀右翼諸部統盟於烏蘭察布其爵

為扎薩克多羅達爾漢卓哩克圖郡王

扎薩克多羅達爾漢卓哩克圖郡王鄂木布列傳
鄂木布四子部落人姓博爾濟吉特元太祖弟哈
布圖哈薩爾十六世孫天聰七年來朝八年偕兄
僧格索諾木弟伊爾扎木等會大軍於錫喇烏蘇
從征明入得勝堡克堡四有敵兵三百自大同城
潛出追擊之俘附明蒙古務巴什索諾木朗素等
師旋以柰曼翁牛特部違令罪各罰駝馬

詔分給鄂木布崇德元年獻駝馬貂皮

賜宴及甲冑雕鞍綵幣授扎薩克

賜號達爾漢卓哩克圖二年遣使貢駝馬三年春從征喀爾喀扎薩克圖汗傾遁乃還冬隨貝勒岳託征明敗太監馮永盛軍四年以巴林部從征喀爾喀私遣馬先歸罪議罰戶口

詔賜鄂木布十之六六年春遣使蒙庫色來朝

賚綵幣復以其屬博內從征索倫凱旋

賚甲冑弓矢裘服金幣冬獻駝馬七年來朝尋以大軍征
明錦州松山捷慶獻駝馬貂皮

賜幣布順治三年以蘇尼特部騰機思等叛逃率衆往勒
陣斬台吉烏班岱多爾濟思喀莽固思額爾密克
碩達等擒叛屬百五十餘獲駝馬牛羊甚衆

命即賜之六年封多羅郡王

詔世襲罔替是年冬睿親王多爾袞征喀爾喀鄂木布以
兵會什巴爾台其屬博內偵敵踪失實議罰牲畜

以前屢効戎績宥之十年鄂木布卒子已拜襲

一次襲已拜鄂木布長子順治十年襲扎薩克多

羅達爾漢卓哩克圖郡王康熙二年卒子沙克都

爾襲

二次襲沙克都爾已拜長子康熙三年襲扎薩克

多羅達爾漢卓哩克圖郡王十四年駐牧宣府左

翼四旗察哈爾為叛賊布爾尼所煽毀邊私遁沙

克都爾馳奏

諭獎之

賜御服貂裘復以沙克都爾遣屬額布根畢哩克等擒喀爾喀右翼鎮國公扎穆素叛卒五

詔給所獲十六年卒子達木巴琿素襲

三次襲達木巴琿素沙克都爾長子康熙十七年襲扎薩克多羅達爾漢卓哩克圖郡王三十一年卒子三濟扎布襲

四次襲三濟扎布達木巴琿素長子康熙三十一

年襲扎薩克多羅達爾漢卓哩克圖郡王三十五年從西路大軍擊噶爾丹於昭莫多四十九年卒子阿喇布坦多爾濟襲

五次襲阿喇布坦多爾濟三濟扎布長子康熙四十九年襲扎薩克多羅達爾漢卓哩克圖郡王雍正九年

詔授副將軍率兵駐固爾班賽堪防噶爾丹策凌十年移駐伯格爾十二年移駐扎布堪十三年撤大軍還

詔阿喇布坦多爾濟以兵千留駐烏里雅蘇台乾隆元年

自軍還二十四年大軍平回部以督購駝馬功

獎給幣三十六年以病罷子三長車稜旺扎勒襲次敏

珠爾旺舒克授台吉次拉什雅木丕勒亦襲郡王

六次襲車稜旺扎勒阿喇布坦多爾濟長子乾隆

三十六年襲扎薩克多羅達爾漢卓哩克圖郡王

尋卒無嗣弟拉什雅木丕勒襲

七次襲拉什雅木丕勒阿喇布坦多爾濟第三子

乾隆三十六年襲扎薩克多羅達爾漢卓哩克圖
郡王四十九年卒子朋楚克桑魯布襲

八次襲朋楚克桑魯布拉什雅木丕勒長子初授
一等台吉乾隆四十九年襲扎薩克多羅達爾漢
卓哩克圖郡王

欽定外藩蒙古回部王公表傳卷之三十九

欽定四庫全書

欽定外藩蒙古回部王公表傳卷之四十

傳第二十四

茂明安部總傳

茂明安部在張家口外至

京師千二百四十里東西距百里南北距百九十里

東界喀爾喀右翼西界烏喇特南界歸化城土默

特北界瀚海元太祖弟哈布圖哈薩爾十三世孫

鄂爾圖飛布延圖子錫喇奇塔特號土謝圖汗有
子三長多爾濟次固穆巴圖魯次桑阿爾齋洪果
爾游牧呼倫貝爾均稱阿魯蒙古多爾濟號布顏
圖汗子車根嗣為茂明安部長天聰七年偕固穆
巴圖魯暨台吉達爾瑪岱袞烏巴什等携戶千餘
來歸獻駝馬八年台吉揚固海杜稜烏巴海達爾
漢巴圖魯瑚稜都喇勒巴特瑪額爾忻岱青阿布
泰繼至均

賜宴

賚甲胄雕鞍銀幣九年烏巴海達爾漢巴圖魯都喇勒叛

逃喀爾喀

遣兵由鄂諾河往剿至阿古庫克特勒斬叛屬千餘追至
喀木尼哈盡俘以還崇德三年巴特瑪瑚稜等從
征喀爾喀扎薩克圖汗偵遁乃還嗣征明山東及
蘇尼特喀爾喀皆以兵從康熙三年授車根長子
僧格扎薩克俾統其衆十三年調兵剿陝西叛鎮

王輔臣十四年駐防大同十五年調赴河南聽江
西大軍檄勦逆藩吳三桂十九年以厄魯特羅卜
藏台吉等掠其部牧產

遣官諭厄魯特察歸所掠二十七年噶爾丹侵喀爾喀
諭嚴防汎二十九年噶爾丹襲喀爾喀昆都倫博碩克圖
衮布踰烏勒扎河奉

詔選兵駐歸化城三十五年從西路大軍擊噶爾丹復簡
兵百防喀爾喀親王善巴汎三十六年朔漠平

賜從征弁兵銀五十四年所部歎收以呼坦和朔儲粟賑
之雍正九年從勦噶爾丹策凌分兵赴固爾班賽
堪駐防十年移駐伯格爾十三年撤還所部一旗
駐牧徹特塞哩隸烏蘭察布盟爵二扎薩克一等
台吉一附多羅貝勒一

扎薩克一等台吉僧格列傳

僧格茂明安部人姓博爾濟吉特元太祖弟哈布
圖哈薩爾十六世孫父車根天聰七年來歸八年

從征明大同崇德元年冬從征朝鮮三年從睿親
王多爾袞入明邊下山東濟南還卒康熙三年

詔授僧格扎薩克一等台吉十一年卒子諾爾布襲

一次襲諾爾布僧格長子康熙十一年襲扎薩克
一等台吉三十五年從大將軍費揚古敗噶爾丹
於昭莫多三十六年復請備糧從征凱旋得

優賚雍正元年卒子齊旺錫喇布襲

二次襲齊旺錫喇布諾爾布第三子雍正元年襲

扎薩克一等台吉乾隆十二年以其次子納旺索諾木與台吉托多爾海偽造符印罪削職長子根敦扎木素襲

三次襲根敦扎木素齊旺錫喇布長子乾隆十二年襲扎薩克一等台吉二十七年卒子薩木坦扎木素襲

四次襲薩木坦扎木素根敦扎木素長子乾隆二十七年襲扎薩克一等台吉四十九年

詔世襲罔替

附多羅貝勒固穆巴圖魯列傳

固穆巴圖魯扎薩克台吉僧格叔祖崇德元年來朝三年從睿親王多爾袞入明邊破太監高起潛軍至山東克濟南順治三年從豫親王多鐸勦蘇尼特部叛人騰機思至喀爾喀敗土謝圖汗車臣汗援兵五年叙功封輔國公七年晉多羅貝勒

詔世襲罔替康熙三年卒子圖巴襲

一次襲圖巴固穆巴圖魯第三子康熙三年襲多羅貝勒三十二年卒子班第襲

二次襲班第圖巴第三子康熙三十二年襲多羅貝勒三十五年從大將軍費揚古敗噶爾丹於昭莫多三十六年復請備糧從征凱旋得

優賚五十六年卒子羅卜藏錫喇布襲

三次襲羅卜藏錫喇布班第次子康熙五十六年襲多羅貝勒乾隆八年卒子裕木克襲

四次襲裕木充羅卜藏錫喇布長子乾隆八年襲多羅貝勒三十九年卒子袞楚克扎布襲

五次襲袞楚克扎布裕木充長子乾隆三十九年襲多羅貝勒四十五年卒子珠克都爾扎布襲

六次襲珠克都爾扎布袞楚克扎布長子乾隆四十五年襲多羅貝勒四十九年卒子丹丕爾襲

七次襲丹丕爾珠克都爾扎布次子初授二等台吉乾隆四十九年襲多羅貝勒

欽定外藩蒙古回部王公表傳卷之四十

欽定四庫全書

欽定外藩蒙古回部王公表傳卷之四十一

傳第二十五

烏喇特部總傳

烏喇特部在歸化城西至

京師千五百二十里東西距二百十五里南北距三百里東界茂明安及歸化城土默特西及南界鄂爾多斯北界喀爾喀右翼元太祖弟哈布圖哈薩

爾十五世孫布爾海游牧呼倫貝爾號所部曰烏喇特子五長賴噶次布揚武次阿爾薩瑚次布魯圖次巴爾賽後分烏喇特為三賴噶孫鄂木布巴爾賽次子哈尼斯青台吉之孫色稜及第五子哈尼泰冰圖台吉之子圖巴分領其衆統號阿嚕蒙古天聰七年率屬來歸貢駝馬八年從大軍征明由喀喇鄂博入得勝堡略大同克堡三臺一師旋以奈曼翁牛特部違令罪各罰駝馬

詔分給所部嗣征朝鮮喀爾喀及明錦州松山薊州皆以
兵從順治五年叙功時鄂木布色稜已卒以圖巴
掌中旗鄂木布子諤班掌前旗色稜子巴克巴海
掌後旗各授扎薩克封鎮國公輔國公爵有差康
熙二十六年

上閱兵盧溝橋

命其部來朝人從觀二十七年噶爾丹侵喀爾喀
諭嚴防汛二十九年噶爾丹襲喀爾喀昆都倫博碩克圖

袞布踰烏勒扎河奉

命選兵駐歸化城三十年以自厄魯特來歸之巴圖爾額

爾克濟農和囉理叛逃

詔備兵五百偵勦三十一年和囉理降撤所備兵歸三十

五年從西路大軍敗噶爾丹於昭莫多三十六年

朔漠平

上由寧夏凱旋四等台吉南春迎

覲賀捷稱

旨晉授一等台吉並

優賚從征及坐塘監收鑿井諸弁兵三十八年以其屬有

貧為盜者

諭諸扎薩克教養之五十四年所部歉收以呼坦和朔儲

粟賑之雍正九年大軍勦噶爾丹策凌

諭選兵防游牧乾隆十九年議勦達瓦齊

詔購駝馬送軍所部三旗駐牧哈達瑪爾隸烏蘭察布盟

爵三扎薩克鎮國公二扎薩克輔國公一

扎薩克鎮國公圖巴列傳

圖巴烏喇特部人姓博爾濟吉特元太祖弟哈布圖哈薩爾十八世孫號額爾赫台吉父哈尼泰冰圖台吉子七長綽克圖布克次托和阿布爾扈次莽哈次莽阿爾岱次即圖巴次桑阿爾齋次音丹次班第天聰八年圖巴偕桑阿爾齋來朝獻駝馬尋偕綽克圖布克託和阿布爾扈莽阿爾岱桑阿爾齋等從征明大同崇德元年圖巴從征朝鮮二

年正月率兵二百由咸鏡道進征瓦爾喀敗朝鮮
援兵於吉木海三年偕綽克圖布克託和阿布爾
扈桑阿爾齋班第等會征喀爾喀四年從征明松
山五年春朝正獻金珠幣馬

賜宴及儀仗甲冑弓矢冬遣桑阿爾齋貢馬六年遣子阿
畢雅及屬烏巴什等獻駝馬貂皮

優賚之七年叙從征明錦州功

賜圖巴及子海色等布幣是年冬選兵從征明薊州八年

莽阿爾岱來獻俘圖巴復率諸台吉表貢馬順治
三年從勦蘇尼特叛人騰機思敗喀爾喀土謝圖
汗車臣汗援兵於扎濟布拉克五年封扎薩克鎮

國公

詔世襲固替十三年卒子海色襲

一次襲海色圖巴長子順治十三年襲扎薩克鎮

國公康熙八年卒子察木察襲

二次襲察木察海色長子康熙八年襲扎薩克鎮

國公二十五年卒子都稜襲

三次襲都稜察木察長子康熙二十五年襲扎薩
克鎮國公三十六年率台吉烏爾圖納蘇圖等從
西路大將軍費揚古追勦噶爾丹五十二年卒子
二長諾爾布璘沁次錫喇布相繼襲

四次襲諾爾布璘沁都稜長子康熙五十二年襲
扎薩克鎮國公五十六年卒無嗣弟錫喇布襲

五次襲錫喇布都稜次子康熙五十六年襲扎薩

克鎮國公乾隆七年卒子索諾木扎木三襲

六次襲索諾木扎木三錫喇布長子乾隆七年襲

扎薩克鎮國公二十年卒子索諾木喇布坦襲

七次襲索諾木喇布坦索諾木扎木三長子乾隆

二十年襲扎薩克鎮國公四十年卒子車布登棟囉

布襲

八次襲車布登棟囉布索諾木喇布坦長子乾隆

四十年襲扎薩克鎮國公

扎薩克鎮國公諤班列傳

諤班烏喇特部人姓博爾濟吉特鎮國公圖巴從子父鄂木布號圖捫達爾漢台吉天聰八年來朝獻駝馬從征明大同尋卒崇德元年諤班從征朝鮮三年率兵會征喀爾喀四年從征明松山六年春朝正

賚布幣秋遣屬翁阿岱來朝

賜章服及貂冠鞞帶冬復遣使圖倫達爾漢來朝七年叙

從征明錦州功

賜諤班及屬鄂爾本等布幣是年冬選兵從征明薊州八年鄂爾本來獻俘諤班復奉表貢馬順治三年從勦蘇尼特叛人騰機思敗喀爾喀土謝圖汗車臣汗援兵於扎濟布拉克五年封扎薩克鎮國公

詔世襲罔替十五年卒子四長博勒都呼次博勒圖相繼襲鎮國公次布延圖授台吉次阿玉什亦襲鎮國

公

一次襲博勒都呼諤班長子順治十五年襲扎薩克鎮國公十八年卒無嗣弟博勒圖襲

二次襲博勒圖諤班次子順治十八年襲扎薩克鎮國公康熙七年卒無嗣弟阿玉什襲

三次襲阿玉什諤班第四子康熙七年襲扎薩克鎮國公十一年卒子諾捫襲

四次襲諾捫阿玉什長子康熙十一年襲扎薩克鎮國公十七年厄魯特額爾德尼和碩齊等糾衆

入內汎劫殺所部已達哩察罕烏爾圖三台吉並
掠其戚屬

諭諾捫恤所遺幼衆並檄諸鄰部協防汎十八年前被掠
之博垂遁歸告厄魯特復謀來掠狀諾捫赴汎禦之
馳疏

聞

詔伊克昭烏蘭察布二盟發兵援勦尋以厄魯特獻已達
哩子女

詔諾捫收養

諭厄魯特歸所掠二十二年諾捫卒子達爾瑪第襲

五次襲達爾瑪第諾捫長子康熙二十三年襲扎
薩克鎮國公二十八年卒子達爾瑪什哩襲

六次襲達爾瑪什哩達爾瑪第長子康熙二十八
年襲扎薩克鎮國公三十五年隨西路大將軍費
揚古敗噶爾丹於昭莫多三十六年率台吉勞彰
錫喇布等從大軍勦噶爾丹雍正二年

詔責其妄崇佛教不恤部衆三年以酷虐罪削職子達爾瑪吉哩第襲

七次襲達爾瑪吉哩第達爾瑪什哩長子雍正三年襲扎薩克鎮國公乾隆十六年卒子二長達爾瑪哩第次濟克默特多爾濟相繼襲

八次襲達爾瑪哩第達爾瑪吉哩第長子乾隆十六年襲扎薩克鎮國公二十九年卒子噶勒桑車稜襲

九次襲噶勒桑車稜達爾瑪哩第長子乾隆二十
九年襲扎薩克鎮國公四十四年卒無嗣弟噶勒
桑羅壘襲

十次襲噶勒桑羅壘達爾瑪哩第次子乾隆四十
四年襲扎薩克鎮國公尋卒無嗣

命其叔父濟克默特多爾濟襲

十一次襲濟克默特多爾濟達爾瑪吉哩第次子
乾隆四十四年襲扎薩克鎮國公

扎薩克輔國公巴克巴海列傳

巴克巴海烏喇特部人姓博爾濟吉特鎮國公圖
巴從孫父色稜號伊勒登和碩齊子七長噶布次
鄂博惠次德木德次阿巴噶勒岱次即色稜次鄂
摩克次鄂摩壘天聰八年色稜來朝獻駝馬尋偕
阿巴噶勒岱鄂摩壘等從征明大同崇德元年其
屬山津以奉

命致書朝鮮遇明皮島兵阻擊之中創歸得

優賚二年遣屬圖伯特來朝色稜尋卒三年巴克巴海率
兵會征喀爾喀四年從征明松山六年遣使珠察
等來朝七年叙從征明錦州功

賜巴克巴海及屬多爾濟等布幣是年冬選兵從征明薊
州八年遣使獻俘復親奉表貢馬順治五年封扎
薩克輔國公

詔世襲罔替是年卒弟楚充克襲

一次襲楚充克巴克巴海弟順治五年襲扎薩克

輔國公康熙二十二年卒子達爾瑪襲

二次襲達爾瑪楚克克長子康熙二十三年襲扎薩克輔國公二十五年卒子鄂勒班襲

三次襲鄂勒班達爾瑪長子康熙二十五年襲扎薩克輔國公三十五年隨西路大將軍費揚古敗噶爾丹於昭莫多四十二年卒子三長垂扎木素襲輔國公次旺舒克授台吉次阿穆爾齡貴亦襲輔國公

四次襲垂扎木素鄂勒班長子康熙四十三年襲
扎薩克輔國公雍正十一年以虐索所部罪削職
弟阿穆爾齡貴襲

五次襲阿穆爾齡貴鄂勒班第三子雍正十一年
襲扎薩克輔國公乾隆十一年卒子恭格喇布坦
襲

六次襲恭格喇布坦阿穆爾齡貴次子乾隆十一
年襲扎薩克輔國公

欽定外藩蒙古回部王公表傳卷之四十一

欽定四庫全書

欽定外藩蒙古回部王公表傳卷之四十二

傳第二十六

喀爾喀右翼部總傳

喀爾喀右翼部在張家口外至

京師千一百三十里東西距百二十里南北距百三十里東界四子部落西界茂明安南界歸化城土默特北界瀚海元太祖十六世孫格呼森扎扎賚

爾琿台吉有子七號喀爾喀七旗分東西中三路
以三汗掌之其第三子諾諾和偉徵諾顏有子二
長阿巴泰號鄂齊賴賽因汗為中路土謝圖汗祖
次阿布和號墨爾根諾顏子三長昂噶海襲父墨
爾根號次喇瑚里號達賴諾顏生本塔爾本巴什
希色爾濟扎木素額琳沁次圖蒙肯號昆都倫諾
顏子車楞都朗生衮布皆為喀爾喀中路台吉隸
土謝圖汗順治十年二月本塔爾以與土謝圖汗

衮布隙偕弟本巴什希扎木素額琳沁及衮布率
戶千餘來歸色爾濟獨留喀爾喀其孫禮塔爾後
來歸授扎薩克台吉見土謝圖汗部傳三月

詔封本塔爾為扎薩克和碩達爾漢親王統其衆

賜牧塔魯渾河與內扎薩克諸部列是為喀爾喀右翼其
稱左翼者為貝勒衮布伊勒登亦自喀爾喀來歸
受封在本塔爾後互見彼傳康熙二十五年喀爾
喀扎薩克圖汗沙喇與土謝圖汗察琿多爾濟構

饜

遣大臣莅盟於庫倫伯勒齊爾由歸化城齎糧往

詔所部扎薩克選駝助運二十七年選兵駐邊偵噶爾丹

二十九年調赴圖拉河酌留兵之半駐歸化城三

十一年

詔發殺虎口倉粟賑其屬貧戶三十五年五月從大將軍

費揚古由西路敗噶爾丹於昭莫多凱旋

詔留軍營餘米給部衆十月發軍前馬瘠者留其地飼牧

三十六年費揚古檄所部兵會大軍於喀爾喀郡
王善巴界師旋

賚從征兵銀五十四年三月因久雪傷牧產

詔發呼坦和朔儲粟賑之雍正九年大軍勦噶爾丹策凌
詔簡兵駐歸化城十年復隨鄂爾多斯郡王扎木揚駐烏
喇特西界十三年撤還乾隆四年

遣大臣察閱備調兵

頒賞有差所部一旗駐牧塔嚕渾河隸烏蘭察布盟爵

四扎薩克多羅達爾漢貝勒一由親王降襲附固
山卓哩克圖貝子一由郡王降襲固山貝子一鎮

國公一

扎薩克和碩達爾漢親王本塔爾列傳

今襲多羅貝勒

本塔爾喀爾喀部人姓博爾濟吉特元太祖二十

世孫順治十年三月封扎薩克和碩達爾漢親王

詔世襲固替六月喀爾喀土謝圖汗袞布等請遣本塔爾

還喀爾喀

上以袞布不察歸所掠巴林人畜又不遣子弟朝妄請給
來歸人

詔責之十七年本塔爾來朝康熙八年卒子諾內襲

一次襲諾內本塔爾第四子康熙九年襲扎薩克
和碩達爾漢親王十四年其叔父鎮國公扎木素
暨子薩嘛噶越界叛逃諾內偕弟薩瑪第等率兵
追獲

諭獎之

賚鞍馬蟒幣茶布二十七年噶爾丹侵喀爾喀土謝圖汗車臣汗扎薩克圖汗屬皆被掠赴界乞降

命諾內率所部及烏喇特茂明安兵二千偵禦噶爾丹二十八年偕台吉弼哩克圖齋

敕諭喀爾喀額爾克岱青諾顏善巴額爾克阿海台吉教
已令撫輯離衆二十九年三月率四子部落及歸
化城土默特兵千屯圖拉河七月分兵駐歸化城
三十一年

賜米賑所屬貧戶三十四年大軍議勦噶爾丹

諭厲兵秣馬以待三十五年五月偕喀爾喀郡王善巴衮
布等由西路隨大將軍費揚古敗噶爾丹於昭莫
多俘其衆五百五十九八月大軍駐善巴界諾內
復以兵從十月

上駐蹕歸化城諾內自軍來朝三十六年正月獻駝運米
尋請備糧從征六月噶爾丹竄斃撤兵歸四十六
年卒子詹達固密降襲達爾漢貝勒

二次襲詹達固密諾內第八子康熙四十九年襲
扎薩克多羅達爾漢貝勒雍正六年卒子拉旺多

爾濟襲

三次襲拉旺多爾濟詹達固密長子雍正七年襲
扎薩克多羅達爾漢貝勒乾隆四十六年卒子車
布登納木扎勒襲

四次襲車布登納木扎勒拉旺多爾濟長子乾隆
四十六年襲扎薩克多羅達爾漢貝勒

附多羅卓哩克圖郡王衮布列傳

今襲固山貝子

衮布達爾漢親王本塔爾從子順治十年封多羅

卓哩克圖郡王先是

遣大臣宣

諭喀爾喀丹津喇嘛等察歸所掠巴林人畜十一年丹津

喇嘛等詭言逃亡衆皆衮布等攜往

上鑒其誣置弗問十八年卒子達爾扎襲

一次襲達爾扎衮布長子順治十八年襲多羅卓

哩克圖郡王康熙二十一年卒子固魯思希襲

二次襲固魯思希達爾扎長子康熙二十二年襲
多羅卓哩克圖郡王三十六年大軍勦噶爾丹乞
赴郭多哩巴爾哈遜軍効力

允之尋以朔漠平撤還四十三年卒子巴特瑪旺扎勒降
襲固山貝子

三次襲巴特瑪旺扎勒固魯思希長子康熙四十
三年襲固山貝子乾隆二十三年卒子車木伯勒

襲

四次襲車木伯勒巴特瑪旺扎勒次子乾隆二十
三年襲固山貝子四十六年卒子車登多爾濟襲
五次襲車登多爾濟車木伯勒長子乾隆四十六
年襲固山貝子四十九年

詔世襲罔替

附固山貝子本巴什希列傳

本巴什希達爾漢親王本塔爾弟順治十年本塔

爾內附本巴什希暨弟扎木素額琳沁從至

上嘉之封本巴什希為固山貝子

詔世襲罔替其屬台吉巴拜授三等子薩喇瑚授三等男

均

賜宴

命諸王以次宴之康熙十四年卒子巴特瑪襲

一次襲巴特瑪本巴什希次子康熙十五年襲固

山貝子二十五年卒子二長進穆巴次班第達相

繼襲

二次襲進穆巴巴特瑪長子康熙二十六年襲固山貝子五十三年卒子達濟襲

三次襲達濟進穆巴長子康熙五十四年襲固山貝子雍正六年卒無嗣

命其叔父班第達襲

四次襲班第達巴特瑪次子雍正七年襲固山貝子十三年卒子阿喇布坦襲

五次襲阿喇布坦班第達長子雍正十三年襲固山貝子乾隆二十五年卒子巴爾準多爾濟襲

六次襲巴爾準多爾濟阿喇布坦長子乾隆二十六年襲固山貝子

附鎮國公薩瑪第列傳

薩瑪第達爾漢親王本塔爾第五子初授一等台吉其叔父扎木素以來歸封鎮國公康熙十四年攜孥叛逃薩瑪第隨兄親王諾內追至巴林翁衮

擒扎木素及子薩嘛噶

詔嘉其功即以扎木素所遺鎮國公爵授之

詔世襲罔替

賚鞍馬幣布二十五年卒子衮布阿喇布坦襲

一次襲衮布阿喇布坦薩瑪第長子康熙二十六年襲鎮國公四十四年卒子索諾木班珠爾襲

二次襲索諾木班珠爾衮布阿喇布坦長子康熙四十四年襲鎮國公雍正九年卒子恭格喇布坦

襲

三次襲恭格喇布坦索諾木班珠爾長子雍正九年襲鎮國公乾隆三十八年卒子袞楚克棟囉布

襲

四次襲袞楚克棟囉布恭格喇布坦長子乾隆三十八年襲鎮國公三十九年卒子丹津多爾濟襲五次襲丹津多爾濟袞楚克棟囉布長子乾隆四十年襲鎮國公

欽定外藩蒙古回部王公表傳卷之四十二